

四庫全書

經部

欽定四庫全書

經部
經禮補逸卷八

詳校官監察御史臣李陽棧

侍讀臣孫球覆勘

總校官檢討臣何思鈞

校對官待詔臣胡士震

謄錄監生臣祝雯

欽定四庫全書

經禮補逸卷八

元 汪克寬 撰

賓禮

朝禮

周禮太宗伯春見曰朝大行人春朝諸侯而圖天下之事幕人凡朝覲共其帷幕幄帝綬掌次諸侯朝覲則張大次小次小臣朝覲沃王盥司几筵凡大朝覲王位設黼依依前南向設莞筵紛紕加縹席畫紕加次席黼純

左右王几典瑞公執桓圭侯執信圭伯執躬圭繅昏三
采三就子執穀璧男執蒲璧繅昏二采再就以朝于王
大史朝覲以書協禮事執書以詔王司士正朝儀之位
辨其貴賤之等三公北面東上孤東面北上卿大夫西
面北上朝士掌外朝之法左九棘孤卿大夫位焉羣士
在其後右九棘公侯伯子男位焉羣吏在其後面三槐
三公位焉州長衆庶在其後

愚案周官有三公三孤之官而周禮不言其職論者

乃謂師氏保氏即大師大保鄉老二卿則公一人註
則以為三公豈知師氏保氏乃中下大夫之職且未
聞以傳稱而鄉老公一人乃置地官之列屬然則三
公居六卿之上而遽以是為三公之師保可乎據今
朝士司士所稱是則周禮未嘗不言公孤也特以六
卿而上兼公孤故不正言其職以繫六官之下爾參
諸周書顧命曰召太保奭芮伯彤伯畢公衛侯毛公
此蓋當時之六卿而奭以太保言毛畢以公言是以

卿兼公故以公稱餘三人者以卿而兼孤又可以類推也此不可不辨

大宗伯朝覲則為上相大司寇凡朝覲前王大僕王視朝則前正位而退入亦如之射人朝覲作大夫介校人朝覲毛馬而頒之飾幣大司徒大賓客令野脩道委積委人賓客共其芻薪肆師大賓客涖筵几築鬻贊果將鬱人掌賓客之祿事和鬱鬯以實彝而陳之旄人凡賓客舞燕樂籥師祭祀則鼓羽籥之舞賓客則亦如之

餘人

掌治備見燕饗賓客禮下

大行人以九儀辨諸侯之命等諸臣之爵

以同邦國之禮上公之禮執桓圭九寸縹藉九寸冕服九章建常九旒樊纓九就貳車九乘介九人禮九牢其朝位賓主之間九十步立當車軹擯者五人諸侯之禮執信圭七寸縹藉七寸冕服七章建常七旒樊纓七就貳車七乘介七人禮七牢朝位賓主之間七十步立當前疾擯者四人諸伯執躬圭其他皆如諸侯之禮諸子穀璧五寸縹藉五寸冕服五章建常五旒樊纓五就貳

車五乘介五人禮五牢朝位賓主之間五十步立當車
衡擯者三人諸男執蒲壁其他皆如諸子之禮凡諸侯
之卿其禮各下其君二等以下及其大夫士皆如之邦
畿方千里其外方五百里謂之侯服歲一見又其外方
五百里謂之甸服二歲一見又其外方五百里謂之男
服三歲一見又其外方五百里謂之采服四歲一見又
其外方五百里謂之衛服五歲一見又其外方五百里
謂之要服六歲一見

愚案大司馬曰九畿職方氏曰九服服言服事天子
畿猶疆限之謂其方里則同也參之周官乃曰六服
五服何耶葛氏註謂侯甸男采衛并畿內謂六服程
氏伯圭釋謂五服蓋指甸男采衛要而侯服不在其
數二說皆未安案大行人六服侯甸男采衛要是知
要服即蠻服也其曰五服一朝者要服不與其列其
曰九服而來朝者亦止五服蓋衛服之外聖人雖制
之服令蕃國世一見而不必其來非若五服一歲至

五歲各以所貢來見也考之武成止曰邦甸侯衛酒
誥康王之誥止曰侯甸男衛康誥亦止曰侯甸男采
衛而蠻夷鎮蕃不與焉於此不必辨其服之異而自
得其說之同矣

司儀掌九儀之賓客擯相之禮將合諸侯則令為壇三
成宮旁一門詔王儀南向見諸侯土揖庶姓時揖異姓
天揖同姓及其擯之各以其禮

愚案大行人司儀掌九儀賓客擯相之禮而置司冠

刑官之屬其稱名也不幾於雜乎徐考六官之中若此者衆如司士掌羣官之版正朝廷之位而屬司馬之類是已論者率謂六官互相聯屬故六屬互相參錯然也豈知聯屬者此固周官立法之善然參錯者則未必若是其不倫也又案小宰記六官六屬各六十秋官自大司寇以下尚六十五人其職屬多寡不同初無是也要亦後之編錄散帙者不免遞相差易故爾觀者察焉

小行人令諸侯春入貢王親受之各以其國之籍禮之
凡諸侯入王則逆勞于畿及郊勞胝館將幣為承而擯
曲禮天子當宁而立諸公東面諸侯西面曰朝鄭注春朝受摯
於朝受享於廟疏曰凡天子三朝一在路門內謂之燕朝太僕掌之一是路門外之朝謂之治朝司士掌之其
三是牽門之內庫門之外謂之外朝朝士掌之

愚案天地位而尊卑定矣卑高陳而貴賤位矣王者
首出庶物德配二儀其尊貴明矣而聖人所恃以為
天下者不獨恃其尊貴勢分也故於諸侯之卑其中

同姓則有伯父叔父焉異姓則有伯舅叔舅焉有兄弟焉有婚姻焉於其來朝也逆勞胝胝具備多儀篤以親親之恩接以主擯之禮而恩禮雖雖於尊貴勢分之間有莫知其德之感化之至也此春朝所以異乎覲禮之受於廟而臣皆北面也夫贄貢諸侯所以述職也今也親受之於朝其志重於器物者明尊賤之禮等也祭器天子所以事神也今也用之於大饗其致敬於賓客者示事神之禮同也若是者豈天子

自示寡昧而忘其尊卑之分哉蓋以億兆歸命于一人未易遽化也治亂潛幾於一德而一德難乎遽孚也於是崇德率衆謙已下賔俾上之恩深下之報厚內外同獎於一心遠近咸歸於一德卒致垂拱成化享國永年而能保其尊貴者有由來矣此所以為三代之至文朝見之盛禮也

書周官六年五服一朝王制天子無事與諸侯相見曰朝考禮正刑一德以尊于天子曲禮君天下曰天子朝諸

侯分職受政任功曰予一人諸侯見天子曰臣某侯某

案此擯者告天子之辭也凡自稱皆曰寡人

樂記朝覲然後諸侯知所以臣

春秋隱公十一年春滕侯薛侯來朝哀公二年夏滕子來朝

愚案春秋書朝三十有六始於滕薛終於滕子然當時或受其朝禮而不報或累往不納而以歸厚薄疏數之節不惟無合於先王殷聘世朝之儀而諸侯於天子述職之典蓋缺如也經皆書而不削以示強弱

安危是非邪正為後世鑒也

覲禮

大宗伯秋見曰覲大行人秋覲以比邦國之功小行人
令諸侯秋獻功王親受之各以其國之籍禮之訝士邦
有賓客則與行人送逆之入於國則為之前驅而辟野
亦如之居館則帥其屬而為之蹕小司徒乃頒比法于
六鄉之大夫使各登其鄉之衆寡六畜車輦辨其物鄉
師以國比之法以時稽其夫家衆寡辨其老幼貴賤廢

疾馬牛之物若國大比則考教察辭稽噐展事以詔誅

賞曲禮天子當依而立諸侯北面而見天子曰覲

案秋一

受之於廟覲者位於廟門外而序入詩韓侯入覲以其介圭入覲于王

大雅

韓奕篇春秋左傳襄公三十一年子產曰諸侯賓至旬設

庭燎覲禮諸侯辭于天子王曰伯父無事歸寧乃

邦

愚案此諸侯入辭而天子告之之辭也忠厚言戒謁

然見之參之書文侯之命曰父義和其歸視爾師寧

爾邦其義同也

宗禮

太宗伯夏見曰宗大行人夏宗以陳天下之謨司會以九貢之法致邦國之財用以九賦之法令田野之財用以九功之法令民職之財用以九式之法均節邦之財用以周知四國之治大司徒施十有二教焉一曰以祀禮教敬則民不苟二曰以陽禮教讓則民不爭三曰以陰禮教親則民不怨四曰以樂禮教和則民不乖五曰

以義辨等則民不越六曰以俗教安則民不偷七曰以
刑教中則民不越八曰以誓教恤則民不怠九曰以度
教節則民知足十曰以世事教能則民不佚職十有一
曰以賢制爵則民慎德十有二曰以庸制祿則民興功
齊僕以宗遇皆乘金路其法儀各以其等為車送逆之
節詩朝宗于海

遇禮

大宗伯冬見曰遇大行人冬遇以協諸侯之慮掌交掌

以節與幣巡邦國之諸侯道王之德意志慮使咸知王之好惡曲禮諸侯未及期相見曰遇春秋隱公四年夏

公及宋公遇于清

莊公三十二年夏宋公齊侯遇于梁丘

愚案古者諸侯朝覲于王不期而遇諸塗則舉相見之禮猶存恭肅之心若春秋書遇則皆惡其簡禮之私而無合乎先王制禮之意也

時會禮

大宗伯時見曰會大行人時會以發四方之禁大宗伯

會同則為上相大司馬會同則帥士庶子而掌其政令
小司馬會同掌其事如大司馬之法射人會同作大夫
介諸子凡會同作羣子從司士凡會同作士從小祝凡
外內小會同掌事焉旅賁氏掌執戈盾夾王車而趨左
八人右八人凡會則服而趨車僕凡師共革車各以其
萃會同亦如之虎賁氏掌先後王而趨以卒伍軍旅會
同亦如之司兵軍事建車之五兵會同亦如之司常掌
九旗之物名各有屬凡祭祀各建其旗會同亦如之典

路凡會同以路從司戈會同授貳車戈盾建乘車之戈
盾授旅賁及虎氏戈盾掌次諸侯會同則張大次小次
幕人凡會同共其帷幕幄帟綬掌舍掌王會同之舍設
楹杅再重設車宮轅門為壇墮宮棘門為帷宮設旌門
外府凡會同共其財用之幣齎賜予之財用廩人凡邦
有會同之事則治其糧與其食遺人凡會同掌其道路
之委積校人凡會同毛馬而頒之飾幣馬射鳥氏掌祭
祀以弓矢歐鳥鳶凡會同亦如之戎右會同充革車司

右凡會同合其車之卒伍而比其乘屬其右牛人凡會同共其兵車之牛稍人若有會同則以縣師之法作其同徒輦輦帥而至縣師若將有會同之戒則受法于司馬以作其衆庶及馬牛車輦會其車人之卒伍使皆備旗鼓兵器以帥而至司弓矢凡會同頒弓弩各以其物從授兵車之儀大司馬以九伐之法正邦國馮弱犯寡則責之賊賁害民則伐之暴內凌外則壇之野荒民散則削之負固不服則侵之賊殺其親則正之放弑其君

則殘之犯令陵政則杜之外內亂鳥獸行則滅之大司
寇凡會同前王小司寇乃宣布于四方憲刑禁士師掌
國之五禁一曰宮禁二曰官禁三曰國禁四曰野禁五
曰軍禁布憲執旌節以宣布于四方而憲邦之刑禁掌
交以諭九禁之難曲禮諸侯相見於郤地曰會春秋隱
公二年公會戎于潛哀公十三年夏公會晉侯及吳子
于黃池

愚案時會謂時見也發禁者凡諸侯有不順服王則

合諸侯而發其禁令以行征討之事如九伐之法此先王時會之禮也春秋書會九十五始於潛終於黃池中間彼善於此僅有蕭魚之特筆餘皆非王事而私會殊非周官入會致事禁止不義之制矣故曰凡書會皆譏也

殷同禮

大宗伯殷見曰同大行人殷同以施天下之政小行人其禮俗政事之逆順每國辨異之以反命于王以周知

天下之故大司馬掌建邦國之九法以佐王平邦國制
畿封國以正邦國設儀辨位以等邦國進賢興功以作
邦國建牧立監以維邦國制軍誥禁以糾邦國施貢分
職以任邦國簡稽鄉民以用邦國均守平則以安邦國
比小事大以和邦國正月之吉始和布政于邦國都鄙
乃縣政象之法于象魏使萬民觀政象

愚案周禮冬官久亡於象法之縣否無可考也餘四
官皆縣象法而何獨宗伯略焉蓋冢宰司徒司馬司

寇之所職曰治曰教曰政曰刑此皆親民之事故各
縣象法以示之若宗伯所職曰禮曰樂率皆朝廷宗
廟之事於民為踈遠而且禮樂實本諸人心之和順
非可以象求故略之無庸縣可也或曰治教政刑皆
可縣象於一時而禮樂之器之文其為品節制度此
獨不可以一二象法示人而塗斯民耳目於無聞見
之地耶曰六藝十二教之目禮樂具述其中而五禮
六樂中和之教以防萬民之情偽者為尤著是以禮

樂示斯民之教者固已縣諸地官司徒之教法而宗伯則以朝廷宗廟之禮樂為專職焉學者於此無徒事乎器物示人之靡迹而必求之人心之和順以推原聖人制作之微意則禮樂中和之教法不獨縣諸司徒而有得於吾心之實者縣象昭昭矣因并釋之乃以九畿之籍施邦國之政職方千里曰國畿其方五百里曰侯畿又其外方五百里曰甸畿又其外方五百里曰男畿又其外方五百里曰采畿又其外方五百里

曰衛畿又其外方五百里曰蠻畿又其外方五百里曰夷畿又其外方五百里曰鎮畿又其外方五百里曰藩畿凡令賦以地與民制之

時聘禮

大宗伯時聘曰問大行人時聘以結諸侯之好小行人合六幣圭以馬璋以皮璧以帛琮以錦琥以繡璜以黼此六物者以和諸侯之好典瑞琬圭以結好掌交掌邦國之通事而結其交好曲禮諸侯使大夫問於諸侯曰

聘春秋隱公七年齊侯使其弟年來聘

愚案古者諸侯間於天子之事則有使問之聘詳見儀禮篇春秋諸侯朝禮不修間自相聘書於經者二十五始於弟年終於士鞅皆惡其挾邦交之私非時聘結好之禮故觀年之書法則可以推其餘矣

殷覲禮

大宗伯殷覲曰視大行人殷覲以除邦國之慝王之所
以撫邦國諸侯者三歲徧覲小行人其悖逆暴亂作慝

猶犯令者每國辨異之以反命于王以周知天下之故
典瑞瑑圭璋璧琮綠皆二采一就以覲聘琬圭以除慝
誦訓掌道方慝以詔辟忌以知土俗王巡守則先王車
匡人掌達法則匡邦國而觀其慝

間問禮

大行人間問以諭諸侯之志掌大賓之禮以親諸侯上
公之禮三問三勞諸侯之禮再問再勞諸伯如諸侯之
禮諸子之禮壹問壹勞諸男如諸子之禮掌交掌以節

與幣巡邦國之諸侯道王之德意志慮使咸知王之好惡誦訓掌道方志以詔觀事擇人掌誦王志道國之政事以巡天下之邦國而諭之

贊貢禮

大行人侯服其貢祀物甸服其貢嬪物男服其貢器物采服其貢服物衛服其貢材物要服其貢貨物

將幣禮

大行人上公廟中將幣三享王禮再裸而酢諸侯廟中

將幣三享王禮一裸而酢諸伯如諸侯之禮諸子廟中
將幣三享王禮一裸不酢諸男如諸子之禮小行人凡
諸侯入將幣為承而擯司儀掌九儀賓客擯相之禮公
於上等侯伯於中等子男於下等其將幣亦如之

饗食禮

大行人上公饗禮九獻食禮九牢出入五積諸侯饗禮
七獻食禮七牢出入四積諸伯如諸侯之禮諸子饗禮
五獻食禮五牢出入三積諸男如諸子之禮

錫命禮

大宗伯王命諸侯則擯典命掌諸臣之五等之命上公九命為伯其國家宮室車旗衣服禮儀皆以九為節侯伯七命其國家宮室車旗衣服禮儀皆以七為節子男五命其國家宮室車旗衣服禮儀皆以五為節王之三公八命其卿六命其大夫四命及其出封皆加一等其國家宮室車旗衣服禮儀亦如之書說命命之曰朝夕納誨以輔台德止欽予時命其維有終微子之命王若

曰爾惟踐修厥猷舊有令聞恪慎克孝肅恭神人予嘉
乃德曰篤不忘上帝時歆下民祇協庸建爾于上公尹
茲東夏欽哉徃敷乃訓慎乃服命蔡仲之命王若曰小
子胡惟爾率德改行克慎厥猷肆予命爾侯于東土徃
即乃封敬哉畢命王曰嗚呼父師今予祇命公以周公
之事徃哉罔命曰今予命汝作大正正于羣僕侍御之
臣懋乃后德交修不逮文侯之命王曰父義和其歸視
爾師寧爾邦用賚爾鉅鬯一卣彤弓一彤矢百盧弓一

盧矢百馬四匹父往哉柔遠寧邇惠康小民無荒寧簡
恤爾都用成爾顯德周易師九二王三錫命晉康侯用
錫馬蕃庶晝日三接詩韓奕韓侯受命王親命之王錫
韓侯淑旂綏章彤弓彤弓昭兮受言藏之我有嘉賓中
心貺之采芣君子來朝何錫予之雖無予之路車乘馬
又何予之玄衮及黼春秋莊公元年王使榮叔來錫桓
公命

愚案周制諸侯踐位而入見則有錫命修聘來朝則

有錫命能敵王所愾而獻功則有錫命此禮之正也
若書稱蔡仲之命文侯之命詩稱王錫韓侯王命召
虎之類是已若遣使就其國而錫命之禮無是也如
春秋書王使榮叔來錫桓公命天王使毛伯來錫公
命之類皆非正也比事以觀義自見矣

左傳僖公二十八年王享醴命晉侯有賜之大路之服
戎路之服文公四年甯武子曰諸侯敵王所愾而獻其
功於是乎賜之彤弓一彤矢百旅弓矢千何氏曰禮有

九錫一車馬二衣服三樂器四朱戶五納陛六虎賁七
弓矢八鈇鉞九鉅鬯

王制天子賜諸侯樂則以祝將之賜伯子男樂則以鼗
將之諸侯賜弓矢然後征賜鈇鉞然後殺賜圭瓚然後
為鬯

經禮補逸卷八

欽定四庫全書

經禮補逸卷九

元 汪克寬 撰

嘉禮

飲食禮

大宗伯以飲食之禮親宗族兄弟小宗伯掌三族之別以辨親疎大僕王燕飲則相其法小臣饗食掌事如大僕之法鍾師凡饗食奏燕樂鎛師凡祭祀鼓其金奏之樂饗食亦如之籥師祭祀則鼓羽籥之舞饗食則亦如

之文王世子若公與族燕則異姓為賓膳宰為主人公與父兄齒族食世降一等公與族燕則以齒而孝弟之道達矣其族食世降一等親親之殺也

愚謂盛哉先王之禮也其本在於養性防欲其用在於視聽言動周旋揖遜之間使人之視聽言動周旋揖遜一於禮則安有放其邪心驕奢淫佚蕩而莫之節者哉不放其邪心不驕奢淫佚蕩而莫之節則禍亂可息孝弟可行治教可興其立意微其為法遠矣

故設其器備其物辨其數立其文以待其有事者其
用則在乎視聽言動周旋揖遜之間而已然孝弟莫
始於親親親親之心無所不用則燕之之禮不得而
廢焉燕之之禮不得而廢則設其器備其物辨其數
立其文以待其有事者於是而用之也是故莫尊乎
君也君雖尊不以位加於父兄燕序必以齒者達乎
孝弟之道也莫親乎同姓也然親親不可以無殺燕
則族人世降一等焉凡燕之禮必主賓以備酬酢而

族燕之賓主則異姓與膳宰為之者篤親親之道也夫飲食口腹之欲也而必節之以禮則驕奢淫佚平而無過也歌舞耳目之欲也而必和之以樂則言動揖遜易而無乖也莫不由親以篤乎恩有恩以著乎愛有愛以盡其禮盡其禮則言動視聽周旋揖遜之間不徒接乎耳目所以服習而安之者自得於養性防欲之幾也雖然不特宗族兄弟之親也遠而異姓諸侯之君臣以至於蠻貊夷狄之邦皆由是禮之行

故人說而天下服矣人說而天下服則禍亂何由作
苟禍亂不作則孝弟行而治教興矣此乃先王之所
以為燕也嗚呼於此可以觀其禮之盛矣

月令季冬之月命樂師大合吹而罷

注歲將終與族人
大飲作樂於大寢

以綴
恩也

王居明堂禮季冬命國為酒以合三族大傳上治

祖禰下治子孫旁治昆弟合族以食序以昭繆穆別之

以禮義人道竭矣

愚案此言繼祖收族之禮故有上治下治旁治之道

以正其恩之隆殺屬之戚疏也蓋合族以食使之有所同而尊卑之禮一序於昭穆使之有所異而親疎之義明如此則皆有禮義之別而人之道盡於此矣抑嘗論之大宗無子則族人以支子為之後為所後服斬衰三年而降本親父母為期何也蓋於所後者以尊服服之又為降已親之服所以明所後者之為重而於大宗者上以繼祖下以收族不可以絕此聖人制禮之意也或謂為人後者當易其父母之名從

所後者為屬而使之無二是未考於禮也蓋父母之服當降使明所後者重而已非遂以謂當變其親也親不當變則名可得而易乎名不可得而易則期服雖除心喪三年禮不可變也而謂輒可以絕其親乎不絕其親而能使其屬之疏者相與為重親之厚者相與為輕在以禮義明其內而不在于惡其為二而強易其名於外也雖然降父母之服禮則有之矣絕父母之名禮未之前聞也禮喪服齊衰不杖期章曰

為人後者為其父母服此其名之見於經未嘗易也
經既不易則凡為人後者生曰本親父母沒曰考妣
禮之正也愚故因昭穆之別特附其說于下以俟知
禮者商確焉

詩棠棣篇儉爾籩豆飲酒之飫兄弟既具和樂且孺伐
木篇伐木許許釃酒有藇既有肥羜以速諸父類弁爾
酒既旨爾殽既嘉豈伊異人兄弟匪他

冠禮

大宗伯以冠昏之禮親成男女禮記郊特牲冠義始冠之緇布之冠也大古冠布齊則緇之其緜也適子冠於阼以著代也無大夫冠禮古者五十而後爵何大夫冠禮之有諸侯之有冠禮夏之末造也天子之元子士也天下無生而貴者也繼世以立諸侯象賢也內則二十而冠玉藻始冠緇布冠自諸侯下達冠而敝之可也玄冠朱組纓天子之冠也緇布冠纁綌諸侯之冠也冠義曰冠者禮之始也是故古者聖王重冠古者冠禮筮日

筮賓所以敬冠事敬冠事所以重禮重禮所以為國本也重冠故行之於廟行之於廟者所以尊重事

三加冠禮

郊特牲醢於客位嘉有成也三加彌尊喻其志也冠而字之敬其名也委貌周道也章甫殷道也毋牟追堆夏

后氏之道也

此始加冠也

周弁殷皐

訓

夏叔

此三加之冠也

三王共

皮弁素積

此論再加冠也

士冠禮始加祝曰令月吉日始加

元服棄爾幼志順爾成德壽考維祺介爾景福再加曰

吉月令辰乃申爾服敬爾威儀淑慎爾德靡壽萬年永
受胡福三加曰以歲之正以月之令咸加爾服兄弟具
在以成厥德黃耆無疆受天之慶

昏禮

大宗伯以冠昏之禮親成男女媒氏掌萬民之判凡男
女自成名以上皆書年月日名焉令男三十而娶女二
十而嫁凡娶判妻入子者皆書之黨正凡黨之昏冠教
其禮事掌其戒禁

愚案妻由判合故云判子者謂媵娣之類非聘之正故云入夫國之男女至衆也年月日名自成名以上皆書之及其判入又書日月以告君禮不幾於繁乎詎知先王之制所以厚男女之別正婚姻之禮者其馭人倫謹始之道至簡而要也夫自有別推而至於萬物安則禮始於謹夫婦者繫於國之男女況於南面天下之主哉是故古之君子未嘗不以身化也故家人之義歸於反身二南之業本於文王世皆知內

而后妃有關雎之行外而羣臣有二南之美而不知其謹始由於文王之身化也考之行露之詩野有死麕之作專言男女貞潔強暴不能侵陵彼秉約肆淫丈夫尚不能安其守顧令天下之女子能之何其盛也人徒見江漢之小國免置之野人莫不蒙化而善俗而不知其所以然者又本諸先王教化之行禮制之謹有以致之也於此可以觀禮而得其要矣

曲禮故日月以告君齊戒以告鬼神為酒食以召鄉黨

僚友以厚其別也郊特牲夫昏禮萬世之始也娶於異姓所以附遠厚別也告之以直信信事人也信婦德也一與之齊終身不改故夫死不嫁又曰昏禮不賀人之序也曾子問娶婦之家三日不舉樂思嗣親也

問名禮

媒氏掌凡男女自成名以上皆書年月日名焉曲禮男女非有行媒不相知名

納幣禮

媒氏凡嫁子娶妻入幣純帛無過五兩曲禮非受幣不交不親郊特牲幣必誠辭無不腆

摯見禮

郊特牲執摯以相見敬章別也

紫執摯所奠雁也

表記無禮不

相見也欲民之無相褻也

親迎禮

郊特牲男子親迎男先於女剛柔之義也天先乎地君先乎臣其義一也壻親御授綏親之也親之也者親之

也敬而親之先王之所以得天下也出乎大門而先

去聲

男帥女女從男夫婦之義由此始也禮記哀公問冕而親迎不已重乎孔子對曰合二姓之好以為宗廟社稷主君何謂已重乎詩大明篇文定厥祥親迎于渭韓奕篇韓侯取妻汾王之甥蹶父之子韓侯迎止于蹶之里

見舅姑禮

昏義夙興婦沐浴以俟見質明贊見婦於舅姑婦執筭棗栗段脩以見贊醴婦婦祭脯醢祭醴成婦禮也舅姑

入室婦以特豚饋明婦順也郊特牲厥明婦盥饋舅姑
卒食舅姑降自西階婦降自阼階

見廟禮

禮記曾子問三月而廟見稱來婦也擇日而祭禰成婦
之義也

愚案禮舅姑存成婚明日婦見舅姑共盥饋之禮此
成昏三月擇日祭禰者則舅姑已沒而婦見于廟也
非謂廟見後擇日又祭也婦人謂嫁曰歸故稱來婦

詩謂之子于歸易言歸妹是矣曰成婦之義者謂生既不獲共養于舅姑廟祭亦如生存盥饋之禮明敬事之當完故曰成婦之義也考之昏義婦見舅姑贊醴婦祭脯醢祭醴明敬事自此始故曰成婦之禮也此雖存沒不同亦皆互文以見義耳然則見廟必待三月者父母既沒為人子者謂婦之來以成絲麻布帛以審守委積蓋藏者其事也和室人當於夫在中饋者其行也上以奉宗廟下以繼後世此又禮之

重也職或不修有可去之事則不可以苟合也故必待久觀其成婦之道而後廟告焉此亦致敬於其所事也

賓射禮

大宗伯以賓射之禮親故舊朋友大司樂及射令奏騶虞大僕王射則贊弓矢小臣賓射掌事如大僕之法鍾師凡射王奏騶虞鑄師凡祭祀鼓其金奏之樂賓射亦如之眡瞭賓射皆奏其鐘鼓典庸器祭祀帥其屬而

設筍簋陳庸器賓射亦如之大史凡射事節中舍筭執其禮事司常凡射共獲旌射人治射儀王以六耦射三侯三獲三容樂以騶虞九節五正諸侯以四耦射二侯二獲二容樂以貍首七節三正孤卿大夫以三耦射一侯一獲一容樂以采蘋五節二正士以三耦射豳侯一獲一容樂以采芣五節二正服不氏射則贊張侯以旌居乏而待獲禮記射義故射者進退周旋必中禮內志正外體直然後持弓矢審固持弓矢審固然後可以言

中此可以觀德行矣

祭侯禮

射人祭侯則為位梓人張皮侯而棲鵠則春以功張五采之侯則遠國屬張獸侯則王以息燕祭侯之禮以酒脯醢其辭曰惟若寧侯毋或若女不寧侯不屬于王所故抗而射女強飲強食詒女曾孫諸侯百福書曰侯以明之

燕賓禮

樂記射鄉食饗所以正交接也射義古者諸侯之射也
必先行燕禮卿大夫士之射也必先行鄉飲酒之禮故
燕禮者所以明君臣之義也鄉飲酒之禮者所以明長
幼之序也詩小雅賓之初筵發彼有的以祈爾爵貍首
篇以燕以射則燕則譽

愚案古者弦木為弧剡木為矢弧矢之利以威天下
見於易繫侯以明之載於虞書則射藝已見於黃帝
堯舜之時而其制度禮文則大備於周也何哉鄉三

物之為教也曰六德曰六行曰六藝蓋蓄德植行而必播之以六藝射之所以為藝而次于禮樂者有足以成人之德行而觀其用舍者也古者天子以射選諸侯卿大夫士以中選之多寡為之慶讓蓋亦主乎習藝觀德之成而不專寓於禦侮克敵之備也諸侯之射必先行燕禮卿大夫之射必先行鄉飲酒之禮此則飾之以禮所以明君臣之義長幼之序也其節天子以騶虞諸侯以貍首卿大夫士以采蘋采芣此

則飾之以樂又所以養人之德使之周還中禮而各不失其節之志也故明乎此則事功成而德行立矣事功成而德行立則暴亂不作暴亂不作則身安而國家可保矣學者於此念始生桑弧蓬矢六以射天地四方必先有志於其所事勉乎心之所得身之所存事之所習以趨乎進德之階窮理之地而不愧於為男子者噫豈維射哉因并釋之

燕饗禮

大宗伯以燕饗之禮親四方之賓客籩人賓客之事共其薦脩之籩實醢人賓客之禮共醢五十甕醢人賓客之禮共醢五十甕外府凡賓客共其財用之幣齋大司徒大賓客令野脩道委積封人凡賓客則飾其牛牲牛人凡賓客之事共其牢禮積膳之牛司門凡四方之賓客造焉則以告委人賓客共其芻薪澤虞凡賓客共澤物圉人凡賓客共其生獸死獸之物場人凡賓客共其瓜蒌鬱人掌賓客之裸事和鬱鬯以實彝而陳之司服

凡賓客共其衣服而奉之典瑞凡賓客之事共其玉器而奉之鍾師凡饗食奏燕樂旋人凡賓客舞燕樂鎛師凡祭祀鼓其金奏之樂饗食亦如之籥師祭祀則鼓羽籥之舞賓客饗食則亦如之司干祭祀舞者既陳則授舞器賓饗亦如之鞀鞀氏祭祀則歛而舞之燕亦如之典庸器祭祀帥其屬而設筭簋陳庸器饗食亦如之司常掌九旗之物名各有屬凡祭祀各建其旗賓客亦如之大司馬饗食羞牲魚授其祭小司馬饗射掌其事如大司

馬之法量人凡饗賓制其從獻脯燔之數量羊人凡賓客共其法羊射鳥氏掌祭祀以弓矢歐鳥鳶凡賓客亦如之服不氏賓客之事則抗皮射人賓客則作卿大夫從司士凡賓客作士從諸子凡賓客作羣子從旅賁氏掌執戈盾凡賓客則服而趨大僕王燕飲則相其法正眠燕朝則正位掌擯相王不眠朝則辭於三公及孤卿小臣正王之燕服位王之燕出入則前驅士師王燕出入則前驅而辟掌客掌四方賓客之牢禮飲食之等數

凡諸侯之禮上公五積皆眡殯牽三問皆脩殯五牢食四十簋十豆四十鉶四十有二壺四十鼎簋十有二牲三十有六皆陳饗餼九牢其死牢如殯之陳牽四牢米百有二十筥醢醢百有二十甕車皆陳車米眡生牢牢十車車乘有五簋車禾眡死牢牢十車車三秬芻薪倍禾皆陳乘禽日九十雙殷膳大牢以及歸三饗三食三燕若弗酌則以幣致之侯伯四積皆眡殯牽再問皆脩殯四牢食三十有二簋八豆三十有二鉶二十有八壺

三十有二鼎簋十有二腥二十有七皆陳饗餼七牢其
死牢如殮之陳牽三牢米百筥醯醢百甕皆陳米三
十車禾四十車芻薪倍禾皆陳乘禽日七十雙殷膳大
牢三饗再食再燕子男三積皆眡殮牽一問以脩殮三
牢食二十有四簋六豆二十有四鉶十有八壺二十有
四鼎簋十有二牲十有八皆陳饗餼五牢其死牢如殮
之陳牽二牢米八十筥醯醢八十甕皆陳米二十車禾
三十車芻薪倍禾皆陳乘禽日五十雙一饗一食一燕

凡諸侯之卿大夫士為國客則如其介之禮以待之詩
湛露厭厭夜飲在宗載考彤弓鍾鼓既設一朝饗之鹿
鳴我有旨酒以燕樂嘉賓之心春秋莊公四年夫人饗
齊侯于祝丘

愚案春秋傳晉侯饗齊侯宋公饗晉侯楚子饗公小
邾子邾子來朝公與之燕公饗宰周公范宣子饗晉
六卿于蒲圃甯俞華耦來公與之燕至鄭伯饗王王
饗晉侯經皆不書而書夫人饗齊侯則以其非禮也

餼獻禮

掌客掌四方賓客之餼獻飲食之等數上公之禮羣介
行人宰史皆有牢及歸凡介行人宰史皆有殮饗餼以
其爵等為之牢禮之陳數唯上介有禽獻夫人致禮八
壺八豆八籩膳大牢致饗大牢食大牢卿皆見以羔膳
大牢侯伯凡介行人宰史皆有殮饗餼以其爵等為之
禮唯上介有禽獻夫人致禮八壺八豆八籩膳大牢致
饗大牢卿皆見以羔膳特牛子男凡介行人宰史皆有

殮饗餼以其爵等為之禮唯上介有禽獻夫人致禮六
壺六豆六簋膳視致饗親見卿皆膳特牛

擯相禮

司儀掌九儀之賓客擯相之禮以詔儀容辭令揖讓之
節凡諸公相為賓主國五積三問皆三辭拜受皆旅擯
主君郊勞交擯三辭及將幣交擯三辭車逆拜辱賓車
進荅拜三揖三讓每門止一相及廟唯上相入賓三揖
三讓登再拜授幣及出車送三請三進再拜賓三還三

辭告辟諸公之臣相為國客則三積皆三辭拜受及大夫郊勞旅擯三辭拜辱三讓登聽命下拜登受賓使者如初之儀及將幣旅擯三辭拜逆客辟三揖每門止一相及廟唯君相入三讓客登拜客三辟授幣下出大僕王燕飲則相其法王眡燕朝則正位掌擯相玉藻小國之君曰孤擯者亦曰孤上大夫曰下臣擯者曰寡君之老下大夫自名擯者曰寡大夫公士擯則曰寡大夫寡君之老大夫有所往必與公士為擯也聘義卿為上擯

大夫為承擯士為紹擯三讓而後傳命三讓而後入廟門三揖而後至階三讓而後升所以致尊讓也禮器禮有擯詔樂有相步溫之至也

送逆禮

訝士邦有賓客則與行人送逆之司儀王燕凡諸侯相為國主賓主君郊勞交擯三辭車逆拜辱三揖三辭拜受車送三還再拜及將幣車逆拜辱再拜授幣賓拜送幣及出車送諸公之臣相為國客及大夫郊勞旅擯三

辭拜辱及退拜送及將幣拜逆客辟授幣下出君館客
客辟介受命遂送凡四方之賓客禮儀辭命餼牢賜獻
以二等從其爵而上下之凡賓客送逆同禮齊僕掌饗
食皆乘金路其法儀各以其等為車送逆之節環人掌
送逆邦國之通賓客以路節達諸四方聘義君使士迎
于境大夫郊勞君親拜逆于大門之內而廟受北面拜
貺拜君命之辱所以致敬也敬讓也者君子之所以相
接也

勞禮

小行人凡諸侯入王則逆勞于畿及郊勞眡館司儀凡諸公相為賓主國五積三問再勞三辭三揖登拜受拜送郊勞三辭諸公之臣相為國客則三積郊勞三辭及禮私面私獻君勞客客再拜稽首君答拜致饗餼如勞之禮曲禮大夫士見於國君君若勞之則還辟再拜稽首

致贈禮

司儀致饗餼還圭饗食致贈及禮私面私獻皆再拜稽首君答拜聘義君親禮賓賓私面私覲致饗餼還圭璋賄贈饗食燕所以明賓客君臣之義也

愚案古者天子諸侯皆有朝聘之禮如大行人歲徧存三歲徧覲五歲徧省此天子所以撫諸侯之禮也春朝而圖天下之事時聘以結諸侯之好此諸侯所以事天子之禮也至於歲相問殷相聘世相朝此諸侯邦交之禮也禮若國君親往則大夫從王燕凡諸

公相為賓主國其擯相禮儀餼牢賜獻各以其爵之
等相待也聘事既畢主國君親執醴以禮賓而遂有
私面私獻之禮賓皆再拜稽首所以正交接之義也
致饗餼還圭璋賄贈饗食燕者賓介就館主君使卿
致饋於賓而還以執來之圭加於賄贈之禮也然則
大夫從君聘而以己之私物覲見主國之君面見主
國之卿大夫可乎夫執圭所以申信也將幣所以致
敬也私以庭實充于諸侯之庭則不敬也不敬是無

王矣夫既從君聘禮無外交也外交是二君矣此皆
非禮也注者謂若大夫執其君之命圭而專使則當
行私覲之禮以申己之信其說悖矣夫從君而來與
受命而聘一也一乃專二乃辟也考之太宰以八柄
詔王馭羣臣曰祿以馭其富予以馭其幸若相覲以
貨是人臣以利交也人臣以利交則二者胥失矣二
者苟失其不致於無禮奪亂者未之有也

賀慶禮

大宗伯以賀慶之禮親異姓之國大行人賀慶以贊諸侯之喜小行人若國有福事則令慶賀之玉藻有慶非君賜不賀士於大夫不承賀下大夫於上大夫承賀

脤膾禮

大宗伯以脤膾之禮親兄弟之國小宗伯饗食授祭大司馬饗食羞牲魚授其祭祭僕凡祭祀致福者展而受之大行人歸脤以交諸侯之福春秋昭公十四年天王使石尚來歸脤公羊傳脤者何俎實也腥曰脤熟曰膾

愚案受賑于社是諸侯助祭而授俎實也非助祭則不授也如襄王使宰孔賜齊侯胙是齊桓有獎王之功而加以殊禮也今天王使石尚賜宜社之肉于魯非緣助祭於京師曾是以為禮乎是故受賑禮也歸賑非禮也

經禮附說

周禮一書果為周公所作乎漢武嘗謂周禮為瀆亂不驗之書何休又云六國陰謀之書歐文忠公謂周

禮可疑者二蘇頌濱謂周禮不可信者三是皆論以
為非周公之遺制也然則周禮果非周公所作乎朱
子蓋嘗以周家法度廣大精密言之嘗以周公建太
平之基本稱之又嘗以周公從廣大心中流出稱之
張橫渠謂周公治周莫詳於周禮賈公彥序周禮廢
興又謂鄭玄徧覽羣經知周禮者乃周公致太平之
迹是則又明為周公所作也考之西漢志於周禮未
之見東漢儒林傳乃謂周官經六篇本孔安國所獻

隋經籍志乃云漢時有李氏得周官上於河間獻王
獨缺冬官一篇獻王購以千金不得遂以考工記補
成六篇奏之孝武時盖有其書特未與五經例置博
士耳至西漢劉歆始置博士遂盛行於世後世因有
周禮作於劉歆之說是則周禮作於周公而非他人
之制明矣然冬官何為而缺也經惟秦燹散帙之餘
與漢儒編錄附麗之誤而始謂之缺也何以知其然
愚因考補散逸得之夫五官所掌曰治曰教曰禮曰

政曰刑而冬官則掌邦士或坐而論道謂之王公或作而行之謂之士大夫或審曲面勢以飭五材以辨民器謂之百工通四方之珍異以資之謂之商旅飭力以長地財謂之農夫治絲麻以成之謂之婦功此冬官之大較也見考工記所載者其屬二十有九皆工之事而士與商農之職俱缺焉考之春官之中如世婦內宗外宗皆宮中之職本屬天官而乃入之春官夏官之中如司士諸子皆掌士之職本屬冬官而

乃入之夏官地官之中如司市質人廛人賈師司蔬
司稽胥肆長泉府此皆主於商土均草人稻人場人
司稼等職此皆主於農皆本屬冬官因其職與大司
徒掌土地人民者相類乃以入之地官若是者謂非
編錄附麗之誤不可也況小宰記六官六屬各六十
考之天官自太宰以下六十二地官大司徒以下七
十九春官大宗伯以下七十一夏官大司馬以下六
十九秋官大司寇以下六十五何則冬官獨缺而為

數不及五官皆盈而餘數過之理無是也他如儀禮有嗇夫之官國語有司商之官皆不載諸周禮此亦冬官之脫簡也要之見載於考工記者固為冬官之屬然司空掌邦土居四民時地利職不止此當自大司空小司空而下撫夏官之中掌士者地官之中掌商農者與夫嗇夫司商之數并今考工記所載之工總屬冬官則不惟合於周官司空之所職與小宰六官六屬之目而且周公制作之盛粲然溢著于編使

人得以觀其會通而為太平典禮之全書也克寬因
并錄卷末以俟博古君子正焉

經禮補逸卷九

欽定四庫全書

經禮補逸

附錄

修史還鄉關

寧國府准太平府關該承准應天府牒文承奉尚書禮部符文欽奉聖旨置局編修元史已行纂成洪武二年八月十一日左丞相宣國公上表進呈御覽過欽奉聖旨編史儒士一十六名各與兩表裏銀三十二兩除存

留外老病的送還鄉里欽此欽遵外數內儒士汪克寬等六名元係徽州紹興等府請到儒士擬合欽依送還鄉里為此省部除將各人元闕號色繳回兵部外仰欽依聖旨事意即便應付船隻遞送還鄉仍行移前路官司一體應付遇陸路應付脚力接送無得失誤遲滯奉此當府除已應付外牒可依上應付順便船隻遞送還鄉仍行移前路官司一體應付如遇陸路一體應付按送施行毋得違誤蒙此當府除已應付外闕請依上應

付施行准此當府除已應付外合行移關請照驗煩為
依上應付順便船隻接送施行如遇陸路應付脚力接
送請勿遲滯須至關者右關徽州府

環谷汪先生行狀

先生諱克寬字德輔一字仲裕汪其姓也上世自歙縣
之黃墩遷于祁門縣北之石山至諱釗徙居縣南之韓
溪五傳有兄第七人並有才名其第五子世容生深深
生敏敏生黻黻生二子長若思無子以弟若谷子僑為

嗣僑補試中國學進士生晔晔生燦字明天繼家學時
羣從昆弟為諸經講師學問文章槩範鄉邑從弟國學
進士東山府君華字榮夫嘗與其族兄二教府君相字
魏大學于雙峯饒子之門饒乃勉齋先生黃文肅公高
第弟子二教及東山問難扣懇悉得其蘊奧祁邑理學
之盛自二公發之東山蚤歲又嘗從學鄱陽廬憲趙先
生介如與故中書右丞五峯先生燕公楠為同門至元
初燕公僉江浙行中書省事道過祁門訪求東山與論

舊故將薦諸朝東山固辭明夫無子東山有五子稔聞
家庭之學明夫夫人王氏請其第三子應新字元美為
嗣是為中山處士記識博洽議論慷慨嘗著便民二十
條力陳當世要務欲上之臺省不果聞者惜之處士娶
同邑貢士石溪先生康鼎寶第二女生五子次四是為
先生大德八年甲辰正月八日月初出先生生于桃墅
里第生而有異處士君謂康夫人曰吾祖考積善陰德
多矣或者食報於是兒興吾宗乎甫六歲石溪教之孝

經論語孟子隨口成誦日記數百言後二年冬石溪謂處士君曰吾老矣不及教訓諸外孫汝第四子骨相非凡宜擇師善教之自是先生從鄉先生學每屈其師日益月異至十歲處士君見先生所學彌進因取東山問學于饒先生講授之書及當時問答之言與先生觀玩遂於理學寢悟乃取朱子四書自定句讀晝夜誦讀恍然知為學之要專勤異於儔輩或達旦不寢母夫人見先生勤苦太甚謂處士君曰是兒讀書過勤脫或因是

致疾不可不戒處士君呼先生諭之曰讀書以養氣為主不宜過勞先生曰某自樂此不為勞也自是讀六經諸子歷代史通鑑綱目等書悉皆成誦延祐四年丁巳先生年十有四歲是秋鄉里傳錄江浙秋試三場題目先生一見揮筆成篇鄉先生驚異曰此天才也明年戊午郡守禮羅婺源道一書院山長雲峯胡先生炳文於郡庠開堂試以激厲後進先生屢中郡學及堂試與庠序諸老成相頡頏矣至壬戌春處士君同先生往饒之

浮梁拜可堂吳先生仲迂于州學吳先生謂諸門人曰
新安汪克寬遠來從遊穎異絕倫勇於為學他日必有
所成及以為文印可於吳先生曰讀書明理蘄體諸
身文章異時可不學而能也先生既得吳先生之訓遂
篤志聖賢之學既歸葺故廬闢書齋于居室之東偏扁
曰思復銘于齋壁以自勵焉次年吳先生講道武林勉
先生充貢先生答以吾斯之未能信躡等謀進某何敢
然至泰定丙寅春聞嚴陵吳先生朝陽以春秋登甲子

進士第任番陽丞特往訪之朝陽先生聞其言喜曰子
可謂真知作春秋之心法矣是秋邑長令聞先生學行
邁異時輩舉應江浙鄉試即中前列次年春先生至京
會試論春秋與主司不合又兼對策切直遂見黜于中
書先生欣然南歸遂奉養之志時貢待制師恭曰德輔
年妙而質純才優而學博賈勇秋闈即中高等上之春
官輒不偶於主司是得之於數千人之中而失之於數
千人之外天道之無常也先生歸自京師刻勵為學痛

自修飭遂厭科舉之文慨然曰道不行於當時矣乃取
聖人手筆之春秋博考諸說之同異得失以胡文定公
之傳為主而研究衆說會萃成書名之曰春秋經傳附
錄疏疏翰林學士虞公序行於世易有程朱傳義音考
詩有集傳音義會通禮有經禮補逸綱目有凡列考異
其餘論著未可枚舉先生於經史聖賢之言心融神會
造詣深劇故為文畧不經意而渾融典雅其教學者誘
掖獎勸無不成人後以經學教授宣歙閒數與師山先

生鄭公講理論學意氣相得尚書巢深先生汪公謝事
家居因遣其孫世賢執經先生之門四方學者知先生
道學之懿從遊甚衆先生嘗語學者曰聖賢之學以躬
行踐履操存省察為先至於文章特其餘事鰲峯玉署
諸老交欲以文章舉薦而先生篤志著述不以一毫利
祿動其心諸從學者以先生所居山谷園遠稱曰環谷
四方學者皆曰環谷先生仍至元戊寅五月居室災先
生夜半奉處士君遷於別室以居奉養備至是年九月

處士君以疾卒先生哀毀踰禮至正壬辰蘄黃兵至先生率長幼避兵深山所居房舍資財為賊焚掠殆盡簞瓢屢空先生晏如也自是連歲兵戈擾攘至聖朝戡定禍亂先生始返故廬洪武三年正月朝廷命行人賫幣禮聘先生至京同翰林潛溪宋公刪修元史是年九月事畢特旨一班俱留祿仕先生以老疾力辭不受乃命禮部設宴賜白金三十兩采段二表裏給驛而還先生抵家以洪武五年壬子十有一月十二日卒年六十有

九先生平居嘗語二子曰吾歿則祔于盛材之先塋其孤遂以是年某月日塋於其所遵治命也娶同邑聘君和溪先生程公之女勤儉以相成其家業程夫人生與先生同年卒於先生前十九年癸巳五月八日子男二人曰希曰偕女二人長適同邑李傑夫蚤卒次適同里謝子原子原卒而守節誓終其身孫男六人銑鐔銳鉞鐔鐔國英蚤歲從學於先生訓迪最深辱知於先生最厚敬述其梗槩于右俾其孤乞銘於當世之名公以圖

不朽焉門人長洲縣學教諭歙人吳國英撰

請春秋胡傳纂疏刊行啓

劉錦文

弱水蓬萊凝睇一方之隔泰山北斗馳心千里之瞻輒
憑尺素之恭敷布寸丹之瀆恭惟尊先生學通經傳道
貫古今明聖人筆削之書述而不作剖賢者異同之說
展也大成推為人之盛心立垂世之大訓無附會糾纏
之失重文彩於奎章極根究取舍之嚴副袞褒於華族
尚書汪公
澤民有序
快四方之先覩續千載之不傳得雋棘闥久

報飛鈴之捷欲傳梓本幸毋韞玉之藏倘沐允從無任
感激俾麟史昭然義見功必有歸將鳩工倏爾書成信
焉可失謹此申覆尚冀兩融

環谷精舍纂助刊書疏

切見環谷先生所著書籍惟春秋纂疏及春秋考異刊
于閩坊綱目考異始刊於萬川任氏書塾今刊於祁庠
矣其餘如周易傳義音考二十六卷詩傳音義會通三
十卷四書音證十卷俱有益後學無力刊行上千好義

君子樂助金穀共成勝事者伏以立言垂訓實裨益於
前修考傳釋經尤有功於後學伏惟環谷先生性資明
敏學問淵源蚤中省闈破天荒於前代晚登史館賜雲
錦於本朝理學冠於諸儒文聲揚於四海著書數百卷
昭若發盲立論幾萬言判然解惑顧書肆刊行之未竟
而學徒鈔錄之尤艱第思獨力以難成惟冀衆輕而易
舉欲資好善必遂成功謹干學士大夫普及賢豪俊傑
冀捐金而勸相將繡木以鐫雕大書特書請著此時之

芳字寡助多助俱留他日之嘉名各發肯心共完勝事
不日良工會集千年善本流傳天壽斯文與山川而悠
久人介景福畀子姓之聰明拱手告聞點頭允可謹咨



